



Inatsisartut Suleriaasianni § 33 naapertorlugu aalajangiiffigisassatut siunnersuut imaattoq saqqummiuppara:

**Ajutoortoqartillugu nunatsinni tusilartut sms-ikkut 112-imut kalerriisinnaalernissaat anguniarlugu Naalakkersuisut peqquneqarnissaannik Inatsisartut aalajangiiffigisassatut siunnersuut.**

(Inatsisartunut ilaasortaq Doris Jakobsen, Siumut)

**Tunngavilersuut:**

Ullumikkut ajutoortoqarpat, innuttaasut allat assigalugit tusilartut oqajuitsullu imaaliillaannaq tuaviortumik tusaasaqarsinnaasutulli 112-imut sianerlutik nalunaarfissaqanngillat ikiorneqarlutillu.

Europa-mi nunat 27-it akornanni nunat arfineq marluk taamaallaat tusilartunut sms-linje-mik kalerriinissamut periarfissaqartitaapput, taakkuali avataanni Europami tusilartut allat 750.000-it nalunaarsinnaanngillat.

Naalagaaffiit Peqatigiit Innarluutilinnut isumaqatigiissutaat (FN's handicapkonvention) naapertorlugu, sms-imik aaqqissuussinissamik malitsitsinngitsut EU-mi nunat 20-it pillugit EU-kommissioni suliasineqarpoq.

Tamanna pillugu European Union of the Deaf (Europami tusilartut kattuffiat)-a siulittaasua Berglind Stefándóttir, oqaaseqarpoq tusilartut pisinnaatitaaffii sumiginnarneqartut ”Tusilartut tamakkiisumik naligiissumillu inuunermi pingaaruteqartunut EU-mi alarmcentrale-nut attaveqarsinnaanngillat. Teknologit inatsisillu piareeqapput. Massakkut nunat ilaasortat pisussaaffitik naammassariaqarpaat kiffartuussillutillu”.

Ajornartorsiut una tikkuarneqartoq innarluutillit ajornartorsiuterpassuisa ilangiinnarpaat nunatsinni aamma takussaasoq, taamaammatt nunatsinni tusilartut eqqarsaatigalugit piaartumik aaqqiisoqartariaqarpoq soorlu 112-imut ajutoortoqartillugu sms-ikkut nalunaarsinnaanikkut innuttaasut allat naligalugit.

Tusilartut ulluinnarni atukkaminnik oqilisaaffigineqarnissaat eqqarsaatigalugu, neriuutigilluinnarpara aalajangiiffigisassatut siunnersuutiga paasineqarluarluni Inatsisartuni ilaasortanit tamanit taparserneqarumaartoq

**Aningaasatigut allaffissornikkullu kingunerisassaita nassuiarneqarneri:**

Siunnersuut piviusunnagortinneqassappat aningaasartuuteqarfiussaaq, teknikkikkut aaqqiineq pisariaqassammat, sms-inik tingooqqaasinnaanissaq anguniarlugu. Taassumap saniatigut periarfissaq nutaaq innuttaasunut paasititsiniutigineqassaaq.